


**G 30**

**546**

930  
546





撫淮小草卷之九

關西道甫李三才著

奏議

自勅待斥按臣謬推疏

題為愚臣自勅待斥按臣堅意謬推懇乞

聖明亟

賜廷議以濟河漕事臣待罪兩准了無善狀頃

緣礦稅復行稅監授棍乘機橫擾欲激

聖怒甘心于臣責臣責在拊循勢不能制更恐釀

成大變貽禍地方已具疏自劾束裝待斥  
乃河漕督臣李頤卧病濟寧四十餘日不  
見司道不收文書而河道變遷正當勘議  
春汛戒嚴正當防守臣不敢以欲去之身  
玩視

國家大計故復躬行防汛兼視河工隨於三  
月初八日閱操揚州適會巡漕御史崔邦  
亮議及河道原委因謂舊歲河決歸德干  
係

陵運一應工程錢糧全賴總河綜理自劉東星  
物故

廷推半年而後李頤始奉

簡命即今勘議方興而李頤又復病篤夫天下  
之事全在乘時去秋做起費力三倍今春  
做起費力七倍如今目下費力十倍運道  
且未知如何耳即雖督行各官上緊會議  
然其專主尤須總河裁決至若河南山東  
更屬別省蓋江北自漕撫兩分之後所奉



璽書並無河道字樣故河工事宜一向不相關  
白管河部司亦不相涉如今河臣病勢如  
此即文移往來亦有不便此臣與邦亮面  
議之大槩也隨於本月十四日接得邦亮  
揭帖為河漕孔亟督臣病危等事內有謂  
臣毅然自任又謂臣言兼漕而不兼河亦  
屬未便臣不覺愕然失措星夜移書止之  
大都謂臣無論才力不堪且正在具疏求  
去今揭云毅然自任是方求去而又求治

河也以漕歸撫猶或可兼以河歸撫勢所  
不逮即下

廷議亦必不肯夫自任以河而終不收效當  
如之何自任兼河而

廷議不肯又當如之何萬為俯改另推大臣  
火速前來任事方為妥當不然是為鑽求  
是為無耻一面求去一面求用致

皇上謂為如何人令

廷臣謂為如何人必當具疏辯白等語尋得

邦亮回書則謂河工緊急巡撫設處錢糧  
便宜動用此近

旨也撫按對面敢謂推託即謂毅然自任何嫌  
紕蓋漕乃撫臣舊物至謂兼河不過如河  
南山東加管河字樣非如總河兼漕兼河  
也上下文若血脉曉然

廷議有何不肯台下有何鑽求其云另推大  
臣一員不佞雖愚豈智不及此緣總河任  
重雖據各道報揭尚不敢謂

廟堂信以為真倘許總河回籍不佞別有一  
段說話決不敢貿貿相累非常之人當為  
朝廷任非常之事台下是何等品格何等經  
濟猶存不必然之慮如此紕回覆到臣談  
臣節據邦亮之辭逆料邦亮之意止緣河  
漕重務事在然眉總河病篤痊可未卜故  
欲將淮北一段總責臣身邦亮自謂無他  
臣亦信其無他但其意在急公辭不及詳  
既未諒臣才力之不堪又不察臣去志之



甚決使不知者聞之必謂臣為干進謂臣  
為無耻如臣前所慮云云也夫士人守身  
如女子守節晝行則掩面夜行則秉燭豈  
故為是硜硜執別嫌明微禮當如此耳至  
若臣萬不得已之情萬不得已之勢前疏  
已明不敢煩

瀆惟望

皇上俯念漕河事急速

勅部院會議處分仍望察臣前疏早

賜罷斥別選才賢以充任使豈惟  
陵運民生胥有攸賴而已緣係愚臣自効待斥  
按臣堅意謬推懇乞

聖明亟

賜廷議以濟河漕事理未敢擅便為此具本專  
差承差涂麒齎捧謹題請

旨

萬曆三十年三月十五日具題奉

聖旨李三才既推託着他去罷員缺即便另推

來用吏部知道

坐營叅將患病疏

題為春汛戒嚴糧運鱗集將官患病急宜更  
補以保重地事據管鳳陽巡撫中軍事叅  
將金一清呈稱卑職於萬曆二十九年十  
月初二日到任因有舊疾時常舉發於本  
年十一月內三十年正月內兩次具文呈  
詳休致復蒙批諭地方多事即出視事敢  
不力疾以圖報塞詎期運蹇愈醫愈病近  
於三月以來左膊筋骨痛甚忽然有聲手



垂不起梳洗俱皆倩人醫生田養德等診視皆謂氣血兩虛新舊疾舉有此沉痼誠非歲月能痊因思淮甸重鎮即今糧船盛行春汛當期豈病廢之夫所宜勝任若不再為呈懇悞事非細伏乞早賜具

題另推將官一員代替容令解任調理等因據此簿查先據本官兩次具呈患病乞休該臣批行調理去後今據前因謹會同巡按直隸監察御史吳崇禮議照淮安一鎮

寔為南北襟喉江海要地大軍駐彼而臣三才遠駐泰州一切控禦機宜全屬將官彈壓往時都司陳答行事乖張以致軍心離畔隨經叅處而金一清以徐州遊擊又係淮安世職素稱廉勇更服兵心故爾咨行兵部陞以叅將職銜管中軍事務不謂本官到任之後每行告病乞要休致而臣三才因值春汛屆期河道多故一以勘歷河工一以閱兵海上於三月內經由淮上

而金一清臥病不出乞要休致是本官之  
病勢纏綿殆非朝夕可望奏效者且今不  
但春汛當嚴而糧艘銜尾而進防護調度  
將何所藉耶相應會

題准其休致另行推補伏乞

勅下兵部將叅將金一清准令致仕遺下員缺  
速於江北沿海守備把總內推陞一員仍  
照舊規以都司職銜尅期前來任事庶無  
悞防汛護運之大計也但人材難得年力

易衰金一清雅負韜鈴正堪馳逐屢經薦  
剡行期大用乃三次告休雖其病體實然  
恐其官於桑梓之地或有掣肘之嫌一旦  
棄置不無可惜待其調理痊可之日另行  
咨薦調補相應員缺以全器使緣係春汛  
戒嚴糧運鱗集將官患病急宜更補以保  
重地事理未敢擅便為此具本專差承差  
蔡宗齋捧謹題請

旨



萬曆三十年三月二十日具題奉

聖旨兵部知道

州縣官給由疏

題為遵例考覈給由州縣正官事先據直隸  
廬州府六安州申准本州知州孫一俊關  
稱見年三十九歲浙江嚴州府建德縣人  
由舉人萬曆二十六年十月二十五日除  
授前職二十七年二月初六日到任扣至  
三十年正月初五日止連閏實歷俸三十  
六箇月三年任滿例應給由又據直隸揚  
州府泰州如臯縣申准本縣知縣張星關

稱見年三十四歲湖廣黃州府蘄州人由  
舉人萬曆二十六年十月二十五日除授  
今職二十七年二月初二日到任內因查  
察獲盜不及半奉文罰俸二箇月不作實  
歷外扣至三十年閏二月初一日止連閏  
實歷俸三十六箇月三年任滿例應給由  
各等因申報到臣俱經批行潁揚二兵備  
道查勘去後續據潁州兵備副使劉如寵  
呈稱行據廬州府查勘得六安州知州孫

一俊三年任內經管徵解過起存各項錢  
糧俱已完足十分積蓄稻穀拆賣引鹽俱  
足原額收支賦罰明白清解軍士足數保  
民實政五事農桑等項六事俱各修舉又  
談本道覆覈別無違礙應准給由等因又  
據揚州兵備副使楊洵呈稱行據揚州府  
查勘得如臯縣知縣張星三年任內經徵  
坐派起運一應錢糧俱完足九分之上積  
穀拆賣引鹽俱已足額清解軍士足數收

支賦罰明白農桑等項六事保民實政五  
事俱已咸修任內委因獲盜不及半年終  
類叅罰俸二箇月已經扣除不作實歷應  
准給由又該本道覆查並無違礙等因各  
呈詳前來據此卷查先准吏部咨為酌議  
考課之法以肅吏治事今後府州縣正官  
給由免其赴京聽撫按從公考覈賢否具  
奏先令就彼復職管事牌冊差人齎繳其稱  
職經薦應得

誥勅命者照例

請給又為申飭考滿官員罰俸事例以定法守  
事節開在外考滿官員罰俸月日俱不准  
作實歷掌印管糧官錢糧完過八分以上  
照例考覈各等因題奉

欽依移咨前來除欽遵通行查照外今據前因  
該臣會同巡按直隸監察御史吳崇禮考  
覈得六安州知州孫一俊質朴無華廉慎  
有用如臯縣知縣張星通明之才清嚴之

守俱稱職查得張星任內因獲盜不及半年終查叅罰俸二箇月事屬因公已經扣明既經各該道府查無違礙臣等覆覈相同俱應准給由除行令各官照例復職接俸管事造冊差人齎部外伏乞

勅下吏部覆加考覈施行緣係遵例考覈給由州縣正官事理未敢擅便為此具本專差承差涂麒齎捧謹題請

旨

萬曆三十年三月二十日具題奉

聖旨吏部知道



州官給由疏

題為遵例考覈給由州正官員事案查先據  
直隸徐州申准本州知州張執閔稱見年  
三十七歲陝西西安府耀州富平縣人由  
舉人萬曆二十一年三月二十九日除授  
山西平陽府解州安邑縣儒學教諭本年  
六月二十七日到任二十五年四月初一  
日陞授南京國子監學正本年七月初五  
日到任二十七年三月二十四日陞授今

職本年閏四月十一日到任扣至三十年  
三月初十日止連閏實歷俸三十六箇月  
三年任滿任內因欠京庫錢糧奉文住俸  
督催旋已完解題

允開復例應給由等因到臣隨經批行淮徐兵  
備道查勘去後續據諛道副使劉大文呈  
稱行據徐州查勘得知州張執三年任內  
經管夏秋起存京庫各項錢糧除奉例蠲  
免外總計實徵本折錢糧完及九分五釐

積蓄稻穀折賣引鹽俱各及數收支賦罰  
明白清解軍士足額農桑等項六事保民  
實政五事俱已加意修舉均有績效任內  
委因未完戶部項下見徵帶徵京庫錢糧  
奉

旨住俸今俱督催完解已蒙戶部覆題

准令開復應准給由又諛本道查覈別無違礙  
等因呈詳前來卷查先准吏部咨為酌議  
考課之法以肅吏治事今後府州縣正官

給由免其赴京聽撫按從公考覈賢否具  
奏先令就彼復職管事牌冊差人齎繳其稱  
職經薦應得

誥勅命者照例

請給又為申飭考滿官員罰俸事例以一法守  
事內開在外考滿官員掌印管糧官錢糧  
料價完過八分之上照例考覈各題奉  
欽依遵行在卷又准戶部咨為欽奉

聖諭事該本部題類覆鳳陽撫按會題內開徐

州知州張執原欠見徵帶徵京庫錢糧  
已完解所住俸糧應准開支等因題奉

欽依移咨前來除欽遵查照外今據前因該

臣

會同巡按直隸監察御史李思孝考覈得  
徐州知州張執年富力強才優守潔稱職  
查得本官任內因拖欠京庫錢糧住俸督  
催解完亦已題

准開復既經該道查覈無礙應准給由除行令  
本官照例復職接俸管事造冊差人齎部

外伏乞

勅下吏部覆加考覈施行緣係遵例考覈給由  
州正官員事理未敢擅便為此具本專差  
承差 齎捧謹題請

旨

萬曆三十年四月十五日具題奉

聖旨吏部知道

報收漕運印卷疏

題為河漕兼攝不便撫臣偏駐非宜懇乞

聖明亟復舊制以重責成以便彈壓事萬曆三  
十年四月十五日准吏部咨該巡按直隸  
監察御史吳崇禮題前事本部會同戶工  
二部覆議合無將總理河道衙門專管河  
務照舊駐劄濟寧往來督理其總督漕運  
衙門照舊兼管鳳陽巡撫防海軍務駐劄  
淮安恭候



命下本部行令見在各官查照舊制管理仍咨行各該部換給

勅書以便行事等因題奉

聖旨是總河着專管河務總漕照舊兼管巡撫欽此欽遵合咨前去煩照覆奉

欽依內事理欽遵先將漕運事務一面管理其加銜請

勅已經具題候奉

旨另行知會等因備咨到臣隨據濟寧兵備副

使衛一鳳將漕運關防吏卷於本月十九日呈送前來先是河漕督臣李頤臥病濟上河道一切工程無從稟白諛臣節遵明旨躬詣淮徐料理糧運事宜詎意督臣物故隨奉漕撫歸併之

命臣隨即分委漕儲漕河等道管河兵備等官催儼官旗晝夜前進但徐邳宿遷一帶間有一二淺澀或量行起剥或併力扛抬新建七閘亦於三月終旬放水行船兼之霖

雨新漲河水盈漕各幫官旗揚帆競渡今年運事或可無虞惟過淮過洪之限稍覺後期耳今准吏部覆奉

欽依令臣先將漕運事務一面管理臣即欽遵行事又通行漕屬省直監兌督糧司道等官一體遵照施行外所有接管受事緣由理合題

報為此具本專差承差涂麒齋捧謹具題知

萬曆三十年四月二十日具題奉

聖旨諒部院知道

報糧船過淮疏

題為恭報糧船過淮事案照舊例每年過淮  
畢日漕運都御史總兵官與巡漕御史會  
疏題

知續於萬曆二十年八月內准戶部咨以後運  
船過淮過洪數目日期總河總漕巡漕等  
衙門俱據實奏報毋得聽憑運官先期虛  
捏等因題奉

欽依欽遵在卷今照萬曆三十年起運二十九

年分漕糧四百萬石節經奉文永折改折并山東河南在北糧船不開外實諛過淮船五千七百六十四隻糧一百九十三萬五百一十八石六斗七升八勺諛臣接管督行漕儲道并各糧兵等道監兌押運等官上緊完兌開幫催進自本年閏二月初一日起至四月十八日止節諛

中都等總留守左等衛指揮馮京等官重運過淮糧船五千五百六十七隻尚有武昌

荊州等衛領兌長沙等府荊門景陵等縣糧米及各衛趕幫零船諛一百九十餘隻委以各縣因災

請折後部覆不允仍徵本色遂致愆期催據湖廣帶管糧儲道按察使楊道會管理漕儲道右叅政董漢儒各呈報俱已完兌開行然尚滯儀闌之外過淮之期未卜以零星餘艘而槩遲通漕之報恐厯

九重之宵旰臣盖有寢食不寧者謹會同提督



漕運總兵官新建伯王承勳巡按直隸監察御史崔邦亮議照今歲起運糧船初因總漕缺人全單緩發即臣受事亦在後時致阻凍軍衛撐駕不前災祲民牧互相觀望漕事之參差未有如此日者幸仰賴

皇威夙播川瀆效靈羣工宣力遠近輻輳俱報過淮涉歷江湖亦無大患臣等待罪漕司豈勝慶忭但揆之單例不無稍逾而勢有偶然難盡苛責除將未到者嚴行談道速

催至日并查違悞緣由另疏叅懲外合先馳報仰慰

聖懷緣係恭報糧船過淮事理為此具本專差承差涂麒齋捧謹具題

知

萬曆三十年四月二十八日具題奉

聖旨戶部知道

被論留守毆傷知府疏

題為被論武職抗不候

旨私逃中途持刃毆傷府官事據潁州兵備副  
使劉如寵呈稱本年四月二十九日戌時  
據鳳陽府同知史可述呈稱照得本府金  
知府泰州公幹將門禁倉庫獄囚鎖鑰開  
送到職管看本月二十八日據濠梁驛馬  
夫王寶報稱本府金知府自泰州公幹回  
府行至府南二十餘里臨淮縣鹿塘地方

途遇被論留守司協同僉書韓有光回籍  
下轎相見有光用拳將金知府打訖一下  
又拏轎上小扛照左臂膊左胳膊狠打二  
下皮破骨折當時昏倒在地又喝令家僕  
精兵舍人數名各執棍劒亂行毆打適有  
定遠縣主簿謝具慶濠梁驛驛丞李文明  
向前跪勸混將謝具慶砍訖一刀李文明  
并門子高應選各被打傷幸虧地方保甲  
長將金知府救擡得脫等情據此嗣後本  
官回府卑職面會俱與前報相同本官左  
膊果打折傷見今臥床不能舉動及查韓  
有光先蒙巡按吳御史論劾續蒙本道憲  
票行令有光候

旨施行今有光不行候

旨私逃回籍途遇金知府挽留有光先疑金知  
府開送心已懷恨又見挽留兇心益逞輒  
持刀棍狠打又令家僕精兵亂毆折傷變  
出異常除將家僕精兵舍人各姓名查的

另報等因到道據此案照先蒙本院憲牌  
為舉劾武職官員事照得留守司協同僉  
書韓有光已該前巡按吳御史論劾行道  
即選相應官員呈詳兩院批委將本官原  
管事務暫代管理行令韓有光候  
旨施行蒙此已經牌行鳳陽府轉行韓有光聽  
候

明旨一面將本官原管事務選定相應官員呈  
詳前來轉詳批委去後今據同知史可述

報稱前因看得留守司僉書韓有光居官  
不檢物議沸騰致蒙按院叅論應候

明旨處分今乃私逃回籍已屬有違更不自省  
反疑怨金知府開送偶遇途次下轎勉留  
何嘗不有同城同官之義輒敢自先拳擊  
棍毆復又率僕兵擅用刃棍亂行砍打以  
致左膊折傷謝主簿亦因救被打當時若  
非鄉兵地方人等救護更不可知似此橫  
暴舉劾亦可報之讎候



旨屬虛文之具無將無法何以越此除將率領  
家僕精兵舍人各姓名本道已經牌行同  
知史可述及移文署正留守淡章查明拏  
究外所有韓有光持刃傷人干係紀綱法  
律異常大變合請速賜查處庶紀綱振體  
統尊武弁不致縱橫矣等因到臣據此又  
據鳳陽府呈為被論武職酗酒逞兇中途  
棍毆府官傷重乞賜叅究以彰

國法事准本府知府金時舒關照得留守司

僉書韓有光蒙巡按吳御史叅論不職蒙  
潁州兵備道憲票仰府行令本官候

旨本府遵行知會訖詎意有光心生狐疑本月  
二十八日故違不俟

明旨擅自啟行探知本職因河工事泰州謁見  
撫院回還本日未時行至地名鹿塘曠野  
處所離府約三十里有光統率家丁人僕  
各持刀棍突到稱說謝辭職不逆其詐隨  
出轎相見有光喝稱我被叅革此事你曾

曉得否職答云此舉勅續密之事我安得而知有光隨逞酒性將職兇毆數拳搶去轎上懸劍一口又搶奪轎上小杠將職左臂膊左胳膊狠打數下皮破骨折當時昏倒命懸湏臾間又喝令家丁各舞刀劍精兵各持槍棍驚散吏書卑役不容進前扶救仍將坐轎砍碎幸有定遠縣主簿謝具慶濠梁驛驛丞李文明向前攔勸與門子高應選俱被打傷又幸地方保甲救脫回

府寮屬各官一聞不勝駭異親到看視傷重咸為痛恨職今因傷偏身發熱筋骨痛甚不能動履飲食少進切照韓有光居官不檢既蒙按院叅論即當杜門省愆恭候明旨處分可也夫何挾按院叅論之忿而遷怒於府官逞一已兇暴之性敢肆打搶傷人之慘似此窮兇極惡之武夫雖夷虜蔑以加矣此曠古所未聞於今始僅見之亦豈盛世所宜有哉若不叅究將使此輩以

王法為弁髦視府官為贅疣將來效尤者接踵其流禍必至於極重而不可返矣合關轉達等因又據談道呈本年五月初二日午時據談府同知史可述具稟內稱有留守司被論僉書韓有光先於四月二十八日踞遇金知府逞兇毒毆傷重當時南行至紅心地方有署正留守淡章遵奉本道憲票差人留回本官次日自乘小轎令家丁四名精兵舍人五六名各持刀劒左右跟

隨徑到本司衙門駐下於本月三十日夜至三更時分本官自上本司大堂擊鼓三通帶領家丁糾率打手舍人軍牢人等齊聲吶喊聲言要闖入鳳陽府將金知府殺死驚動一方士民當報到職隨會同龔通判登府大門樓看守至五更方止又聞差人往原籍南京傳叫弟男子姪數人各有膂力來府併力助惡况

中都重地似此武官肆橫無禁搖動地方事



千重大理合稟報等因到道看得韓有光毆打金知府傷重骨折已屬異常大變乃復因正留守淡章趕回又輒糾率軍兵各持刀劍暮夜擊鼓齊聲吶喊稱言闖殺金知府以致士民驚動雖史同知龔通判登樓看守事未必然然以糾劾

重典不自引咎乃敢橫暴叱咤目中無人幾於無法等因到<sub>臣</sub>不勝驚訝除牌行談道令其親詣鳳陽安戢防備外續准巡按李御

### 史會稿前來理合會

題談<sub>臣</sub>會同巡按直隸監察御史李思孝為照江北地方河患頻仍鹽稅交訐人人思亂在在生心時事孔棘未有甚於今日者<sub>臣</sub>等督率文武將吏百計撫禦一意調停惟恐地方有事貽憂

君父詎意翫法敗度淫威以逞如留守僉書韓有光者扒心本貪賊性復桀暴既經按<sub>臣</sub>論劾自宜席藁待罪靜聽處分乃敢撾鼓

擯兵謀殺守臣徒逞私憤不顧

陵園目無

朝廷敢為亂首倘愚民觀望效尤乘風而起

其為地方無窮之害尚忍言哉臣當即

差旗牌官王斌等星夜齎臣原奉

令字旗牌前赴鳳陽着落署正留守淡章先將

韓有光拏送諫司羈候俟

明旨至日按法處治隨從家丁先行提究又行

潁州兵備道整頓兵馬嚴為防禦外容

今被論留守司協同僉書韓有光剛愎存

心暴虐成性始以狼貪被縶繼因狐疑遷

怒郡守被其橫毆左膊摧殘部軍痛遭鞭

箠移時殞命官民泣救輒敢挺刃以戕人

寮案慰留更復鳴桴而鼓譟弁髦法紀毫

無忌憚之心震驚

寢園大悖人臣之禮所當盡法重擬以警狂肆

者也伏乞

勅下兵部覆議上

請行臣等提問如律并前所叅賊私一併究明

回

奏施行緣係被論武職抗不候

旨私逃中途持刃毆傷府官事理未敢擅便為此具本專差承差涂麒齎捧謹題請

旨

萬曆三十年五月初八日具題談刑部覆奉聖旨是韓有光被論私逃毆傷方面好生兇悖着革了職撫按官嚴行提問具奏欽此

報離任疏

查近例候代具而未上

題為恭報離任日期併瀝愚誠萬懇

天恩特賜

垂聽事臣於本年四月三十日得報奉

旨准臣回籍長林豐草頓遂麋鹿之思躊躇地踞

天罔報

高厚之德感激泣下死且不朽及查吏部

題准事例凡總漕衙門及腹裏巡撫俱不候

代臣謹遵依隨於五月十三日自泰州起



身一應關防吏卷交與淮徐兵備副使劉  
大文候新任督臣徑自呈送外但臣身雖  
去

國而區區微誠猶有不能自己者竊不自量  
必欲披瀝於

皇上之前願戒

皇上之終一

垂聽也夫犬馬異類猶知戀主葵藿微物亦且

向陽何況臣者戴髮含齒沐

祖宗三百年之教養竊

皇上三十年之祿位而曾草木禽獸之不如乎  
蓋昔臣之在事也猶恐或與諸璫競利或  
於百姓要名或挾私而妄陳或信口而沽  
直今臣已去矣無復爭名爭利已立於是  
非風塵之外矣臣今日所言皆平心易氣  
熟思旁觀固忠言也且凡填撫諸臣如及  
三年地方各司例有疏舉亦有揭薦臣皆  
不行非嫌於市恩也以吏治減否不過安

民之一事况内有部院外有按臣酌斟才  
品自有攸當

國家之治亂安危尚不在此且豺狼滿路麟  
鳳何為痞結當心參著無用故臣不暇及  
耳乃若日夜憂皇食不甘咽寢不沾背惟  
在礦稅二字而已蓋礦稅之害民也甚大  
而內使之害民也則尤甚內使之害民也  
已甚而委官叅隨之害民也則更甚蓋若  
輩者奸貪殘賊原非良善或歇案之盜賊

或犯罪之軍徒一充內監遂莫敢何虎狼  
嘯聚電焰奔騰晝則傀儡登場夜則娼酒  
共嬉嗟乎嗟乎士人進身叨寄一命始則  
鄉舉

廷選繼而量材授官内有閣部臺省之體訪  
外有撫按監司之廉察綜覈之法至嚴至  
密蓋以民命甚重操刀必傷故

祖宗重之如此實不敢輕易受人以政耳然如  
此立法尚且有貪婪酷暴不顧身名平掛

吏議者而況主之以目不識丁之內使附之以肆無忌憚之羣賊無天於上無地於下喜怒由心刑戮在口而乃獨當財利之權斷制萬民之命豈不痛哉近且積威所劫相習成風有司懼禍甘心于不報上官推事借口于罔聞藐爾窮民何所怙恃惟有忍氣吞聲或逃或死如水斯壅如毒斯蓄潰必滔天決當殞命雖有神聖豈能救其萬一哉夫歷代興亡載在方冊三代而

下宋元而上班班可考歷歷有徵蓋其得之也莫不以導利而布之下其失之也莫不以歛怨而厚之藏書之千古傳之于今原使後人鑒於前車改此覆轍此古先聖帝明王所以仁愛萬世之心哀矜萬世之意也豈徒焦唇敝舌嘔血剝心弄其文墨已耶故使所載而皆不足信也則可使所載而果有可信也寧不為之寒心哉臣近年以來仰觀俯察遠稽近取每臨食而長



嗟忽中夜而起坐既非老悖皇惑又非病  
狂喪心不知何故膠結糾纏不能自解如  
此豈於古今成敗之迹或小能窺其萬一  
耶為今之計惟願

皇上亟罷礦稅亟撤內使一應投充諸惡嚴行  
各處撫按查其真正名姓明許首告果得  
情實即行籍沒不惟

國典得伸民怨可雪而羣奸入官之多賊即  
可克百姓三年之租賦取彼殘賊救民水

火固

聖主明王之大政大法也抑臣聞之詩矣雖無  
老成人尚有典刑曾是莫聽大命以傾夫  
自古無有不亂之國而患無以制亂者人  
是已自古無有不病之人而患無以制病  
者藥是已夫人者固對病之藥而制亂之  
具也方今閣部臺省濟濟盈

朝放逐閒廢悠悠滿野典刑斯存老成具在  
顧

皇上曾否聽之耳目今縱使礦稅盡罷內使盡  
撤竊恐大病之後凋瘵已甚元氣已傷非  
上下同心大小協贊未易救也尤當親信  
大臣委任臺省

旰食宵衣脩廢補墜諸凡以言被棄以事相累  
者俾之並包於

蓋載之下兼收於藥籠之中則有其具者易其  
備野無遺賢自

朝無失政縱使海內困窮之後必無揭竿斬

木之憂即有弄兵潢池之警亦無薰天燎  
原之勢所謂則猶可及止耳臣言盡於此  
矣從此再無可言之會矣安危之機成敗  
之數亦決于此矣據案援筆血淚滿襟倘  
得犬馬之誠上格

皇天葵藿之心面光白日

采此芻蕘哀彼下民臣即殞首九原捐軀草莽  
夫復何恨夫復何悔伏望

皇上察臣事外之身事外之口極公極平無偏

無偽特賜

省覽速見施行天下幸甚臣愚幸甚至如借口  
焉文之說託名斯辱之旨輕棄

主恩悻悻自好忍心者則為之臣不能也緣係  
恭報離任日期併瀝愚誠萬懇

天恩特賜

垂聽事理為此具本專差承差涂麒齋捧謹題  
請

旨

萬曆三十年五月 日



報夏災疏

題為地方災傷疊至疲民艱苦難堪懇乞

聖明破格蠲恤以蘇積困事本年四等月十一  
等日節據鳳陽府屬宿毫泗三州定遠懷  
遠潁上虹縣盱眙靈璧霍丘七縣各申報  
災民告報災傷情由隨諒各掌印官詣勘  
各州縣地方每年非旱即水民多失業去  
歲黃河衝決麥禾淹漫房廬傾淌幸蒙勘  
恤蠲停改折小民稍有樂生之心正賴今

歲麥禾餬口不意正二月間異常風雪盡  
遭凍爛復種晚麥三四月以來又值猛雨  
冰雹二麥亦被淹沒秋禾又損其秧時已  
過期又難佈種小民終年絕望老幼悲號  
遍野思奔他鄉就食錢糧從何出辦此等  
景象觸目傷心真有不忍見聞者惟有請  
乞勘

題軫念積災大加蠲恤少存子遺等因又據

淮安府屬海州鹽城清河安東贛榆沐陽

睢寧六縣各申稱疊災之後民貧已極各  
郡邑俱臨邊海河岸地勢低窪災沴接踵  
年望一年強圖生活去冬耕鋤高阜栽種  
二麥滿擬今夏收穫餬口當差詎意正二  
月久雪三四月冰雹霖雨入土者被凍不  
發出土者浥爛無遺時值青黃不接又逢  
饑饉相仍米價騰貴斗粟錢餘二麥既已  
無收秋禾復淹過半雖高阜之地僅存一  
二尚不足以供餬口新舊錢糧羽檄交徵

急如星火從何輸納災民俱皆菜色男婦  
悲啼震天至於哀求蠲賑之狀情委難堪  
伏望早賜委官踏勘盡蠲以前各項未完  
改折當年米麥極揀倒懸生命等因又據  
揚州府屬高通泰三州興化如皋海門三  
縣各申稱地聯江湖形若釜底賦重差繁  
民窮徹骨既無行商生理止靠種田養命  
二十八九年二麥盡行淹死顆粒無收  
稻無半穫民遭塗炭逃亡不可勝計今年

猶望二麥救生何期自春入夏以來大雪  
霏雨月無停日四野田地一望汪洋二麥  
秋禾盡沉水底萬民俱屬失望目前胡以  
聊生諸所呼籲之聲不忍見聞若不早為  
申請破格蠲賑將來民命何所瞻依正賦  
何所辦納誠有大可慮者合無俯念疊災  
殘黎速為題

請大破常旆以解瘡痍等因各申報到臣俱經  
批行淮揚潁三兵備道作速委官查勘酌



奏議通詳仍聽巡按御史覈實題

請蠲停賑恤及有續報夏秋災傷至者總聽按臣勘報外卷查萬曆十三年五月內准戶部咨該本部題為欽奉

聖諭并陳末議以廣

德意以消災沴事前開今後災傷去處許小民各将被災地畝開報掌印官親自踏勘一面申報巡撫具

奏一面造花名地畝文冊送巡按覈實定擬

分數奏報前後不嫌異同待本部題覆至日即按冊照例蠲免夏災定限五月以裏秋災定限七月以裏奏報等因備咨遵行在卷今據前因該臣看得江北鳳亳蒙潁一帶適當黃河新決之所淮揚各屬又係江海斥鹵之地數年以來無歲不遭旱澇之灾百姓彫瘁已極時復鹽稅橫征河工大舉以故閭里蕭條生民愁嘆真有令人不忍見聞者不意今春至夏風雪霽雨冰

電交作二麥盡皆淹爛秋禾亦被損傷縱  
有高阜之地僅存一二實不足以供餬口  
如此景象雖救死不暇舊逋新徵豈堪敲  
朴若非破柅蠲恤改折恐民窮盜起而  
國家

根本之地大有可慮者矣伏乞

勅下戶部速行巡按御史覆加查勘酌議分數  
上

請分別蠲賑改折仍行臣遵照施行災民幸甚

臣愚幸甚緣係地方災傷疊至疲民艱苦  
難堪懇乞

聖明破格蠲恤以蘇積困事理未敢擅便為此  
具本專差承差涂麒齋捧謹題請

旨

萬曆三十年五月十五日具題奉

聖旨戶部知道

報糧船過洪疏

題為恭報糧船盡數過洪以慰

聖衷事據專管漕務右叅政董漢儒淮徐兵備

副使劉大文呈報各總衛所運萬曆二十

九年分實談過洪糧一百九十七萬七千

五百六十六石六升八勺船五千八百九

十八隻俱於本年五月二十七日盡數過

洪訖緣由到臣案照萬曆二十年八月內

准戶部咨開以後過淮過洪船隻數目日



期總河總漕巡漕等衙門俱應據實奏報  
毋得聽憑先期覘報題奉

欽依備咨在卷今據前因諛臣會同提督漕運  
總兵官新建伯王承勳巡按直隸監察御  
史崔邦亮議照今歲糧船過洪視往年少  
遲旬月蓋緣漕臣物故發單原遲兩月殊  
非有司軍衛敢於怠玩諛臣接管看得過  
淮過洪期限已違節經傳檄官軍星飛攢  
進及行沿河司道毋容停泊時刻遷延驅

逐出境若以發單月日較往年過洪之期  
尤早月餘及稽諸往牒常年過洪驚濤怒  
浪患在漂失頻年以來患在淺阻曩自河  
決黃堦則全河強弩之勢南下僅餘一線  
河流舊歲再決蒙牆而故道遂成乾涸致  
屢

宵旰南顧之憂即在

廷當事諸臣罔不疾首蹙額咸謂無漕矣臣  
等待罪地方殊切隱憂茫無所措乃循行

河上荒度周諮議建閘座以時節宣蓄水  
濟運荷蒙

皇上特賜

俞允元材鳩工克期報竣舉皆仰賴

皇上一德祐天百靈效順霖雨時若河流增深  
萬艘雲飛揚帆競渡且今歲漂流絕少計  
過洪入閘之後河道安流可保無虞臣等  
得藉以追後事之誅莫不私相慶幸豈區  
區文武將吏所能致歟除行談道嚴督各  
把總官催押前進外緣係恭報糧船盡數  
過洪以慰

聖衷事理為此具本專差承差涂麒齋捧謹具  
題

知

萬曆三十年六月初六日具題奉

聖旨戶部知道

就近陞補運同疏

題為急缺運司佐貳官員乞

賜就近推補以裨鹺政事據揚州海防兵備副  
使楊洵呈稱兩淮運司歲辦課銀當天下  
漕粟之直近日邊儲無措至差司屬乘傳  
督催相望於道此往年所未覩者蓋自新  
增工本存積等項加派以來引鹽日阻徵  
解益艱是兩淮轉運視他處為倍繁在今  
日尤難處向運使已缺兩年近幸銓補而



遠在萬里外履任尚未有期獨一運同陶  
允明拮据支撐今又病故似不得不議處  
者查得揚州府清軍同知杜縻清操勁節  
卓識長才揮霍儘有擔當沉練雅能幹濟  
資俸已深例當陞轉若使之就近推補運  
同員缺人地相宜實為妥便等因呈詳到  
臣諒臣會同巡按御史李思孝巡鹽御史  
蔣以化議照兩淮運司賦課最鉅綜理寔  
艱運使雖已銓補而遠地未能即至所藉

以攝事代庖者僅一運同陶允明今奄忽  
淪亡矣既乏其人釐政曷舉臣等求一相  
應官員共資幹濟則惟揚州府同知杜縻  
者其人也本官守峻一塵法嚴三尺州邑  
小民在在誦為青天遠近商賈人人稔其  
治行若以之推補諫司運同必能承蜩削  
堊艱鉅克勝第運司各官向來陞轉稍抑  
以故中外厭薄杜縻才品資俸允宜優以  
顯秩不當復令治醴惟是兩淮浮課橫增

弊竇叢啟拯援補救斯時更難且招携流  
亡追徵積課一日似不可缺人擇官任人  
尤於鹽政喫緊臣等但求官得其人不遑  
計處非其地也伏乞

勅下吏部再加查議如臣等所言不謬亟為上  
請將杜縻准補兩淮運司同知行令就便到任  
管事庶釐司得人商竈有賴矣緣係急缺  
運司佐貳官員乞

賜就近推補以裨釐政事理未敢擅便為此具  
本專差承差涂麒齋捧謹題請

旨

萬曆三十年六月二十二日具題奉

聖旨

管河府佐給由疏

題為遵例保留給由府佐官員事先據直隸  
淮安府申准本府清軍管河同知崔維嶽  
關稱見年三十八歲直隸大名府大名縣  
人由舉人萬曆十七年除授直隸真定府  
樂城縣儒學教諭至二十年九月內陞國  
子監助教二十二年三月內陞直隸鳳陽  
府宿州知州二十六年六月內陞授今職  
本年八月二十二日到任內因二十七



兩年清軍不及分數二次奉文罰俸三箇月不作實歷外扣至二十九年十月二十一日止連閏實歷俸三十六箇月三年任滿任內又因接管前官拖欠二十一二年馬價錢糧又因帶管京庫錢糧未完俱奉文住俸督催其京庫錢糧旋已催完馬價錢糧遇蒙

恩詔及遇災蠲免俱經題

准開復例應給由等因申報到臣隨經批行淮

徐兵備道查勘去後續據該道副使劉大文呈行據淮安府呈查勘得同知崔維嶽三年任內經管馬價草料場租除奉例蠲停外總計實徵帶徵錢糧完及八分之上清解軍士計完足九分經管河道開墾荒田俱有成績委署府州縣印務經徵錢糧完及分數積穀亦已過額收支賦罰明白保民實政五事農桑六事俱已咸修任內先因清軍不足分數二次罰俸三箇月已

經扣除不作實歷又因錢糧馬價未完二次奉文住俸督催或已徵完或遇災蠲豁及蒙

恩詔俱已題

准開復別無違礙應准給由造冊赴部考覈但本官專管清軍并海口河道且見今委署諛府印務催徵各項錢糧難以離任正與有事地方保留事例脗合相應保留等因到道看得同知崔維嶽三年任內委因清

軍不及分數二次奉文罰俸三箇月俱經扣除不作實歷又因拖欠京庫錢糧馬價二次奉文住俸錢糧督催完解馬價遇災蠲豁及奉

恩詔俱已題

准開復委無違礙應准給由且本官額管戎馬事務兼管海口一帶河道正當修防之時且又見署府印起派河工夫役催徵各項錢糧皆賴本官料理似難一日暫離伏乞

照例保留等因具呈前來據此卷查先准吏部咨為酌議考課之法以肅吏治事今後在外三六年考滿官員除方面府佐照舊赴京有事地方照舊保留聽撫按從公考覈賢否具

奏先令帶俸就彼復職管事牌冊差人齎繳其稱職經薦應得

誥勅命者照例

請給又為給由事內開凡遇州縣掌印官及管

漕河府佐并地方有緊要事情官員考滿俱照舊保留又為申飭考滿官員罰俸例以定法守事節開在外考滿官員罰俸月日俱不准作實歷掌印管糧官錢糧料價完過八分以上照例考滿又准兵部咨開清軍事例內一款清勾事宜通行撫按嚴督各掌印清軍官將奉單清勾軍士務要加意清理如數起解每年終聽巡按御史計筭分數如司府清軍官州縣掌印官



完及六分以上者免議七分以上者敘薦  
八分以上者題

請紀錄又准戶部咨為欽奉

聖諭事該本部題顙覆鳳陽撫按會題內開淮  
安府同知崔維嶽帶管原欠見徵帶徵京  
庫錢糧俱已完解所住俸糧應准開支又  
准兵部咨為

開讀事該本部題准鳳陽巡撫衙門咨內開淮  
安府管馬同知崔維嶽先因各屬拖欠馬

價銀兩照例住俸近該本部題免又遇

恩詔所住俸糧應准開支各等因題奉

欽依移咨前來除欽遵查照外今據前因該

臣

會同總理河道工部右侍郎曾如春巡按  
直隸監察御史李思孝考覈得淮安府同  
知崔維嶽操持嚴慎政事詳明稱職第本  
官職司清軍馬政事務專管海口一帶河  
道伏秋已至正值修防之際又委署管該  
府印務即今河工大興起派人夫催徵錢

糧全藉本官料理既經談道查議前來相應保留伏乞

勅下吏部查議上

請照例行令崔維嶽免其赴部容令接俸管事  
造冊差人齎部考覈施行緣係遵例保留  
給由府佐官員事理未敢擅便為此具本  
專差承差蔡宗齎捧謹題請

旨

萬曆三十年六月二十六日具題奉

聖旨吏部知道

府佐給由疏

題為遵例保留給由府佐官員事先據直隸鳳陽府申准本府推官王家相牒稱見年三十一歲直隸真定府獲鹿縣人由進士萬曆二十七年四月二十五日除授前職本年六月二十九日到任扣至萬曆三十年五月二十八日止連閏實歷俸三十六箇月三年任滿例應給由等因申報到臣隨經批行潁州兵備道查勘去後續據談



道副使劉如寵呈行據鳳陽府呈查勘得  
推官王家相三年任內並無不明經手錢  
糧亦無粘帶不了事件公私過名等項違  
礙情弊例應給由造冊赴部考覈但本官  
即今奉委督修泗州護

陵隄工實為地方重務且工作方興勢難離任  
合應照例保留等因到道看得推官王家  
相三年任內委無違礙應准給由且本官  
見今委修泗州護

陵隄工難以離任請乞照例保留等因且呈前  
來據此卷查先准吏部咨為酌議考課之  
法以肅吏治事今後在外三六年考滿官  
員除方面府佐照舊赴京有事地方照舊  
保留聽撫按從公考覈賢否具

奏先令帶俸就彼復職管事牌冊差人齎繳  
其稱職經薦應得

誥勅命者照例  
請給等因題奉

欽依移咨遵行在卷今據前因談臣會同巡按直隸監察御史李思孝考覈得鳳陽府推官王家相品格真誠才諳敏練稱職第本官見委督修泗州

祖陵隄工事屬喫緊委難離任既經談道查議前來相應保留伏乞

勅下吏部覆議上

請照例行令王家相免其赴部容令接俸管事造冊差人齎部考覈施行緣係遵例保留給由府佐官員事理未敢擅便為此具本專差承差蔡宗齎捧謹題請

旨

萬曆三十年六月二十六日具題奉

聖旨吏部知道

州縣官給由疏

題為遵例考覈給由州縣正官事先據直隸  
鳳陽府泗州申准本州知州曾惟誠關稱  
見年三十歲四川敘州府富順縣人由舉  
人萬曆二十七年四月內除授今職本年  
六月十一日到任扣至三十年五月初十  
日止連閏實歷俸三十六箇月三年任滿  
任內因拖欠京庫錢糧奉文住俸旋已完  
解題



准開復例應給由又據定遠縣申准本縣知縣  
蘇日登閔稱見年三十七歲廣東廣州府  
順德縣人由舉人萬曆二十年四月內除  
授福建延平府永安縣儒學教諭二十二  
年五月內丁父憂服闋赴部二十五年四  
月內復除浙江寧波府慈谿縣儒學教諭  
二十七年四月內陞授今職本年六月初  
十日到任扣至三十年五月初九日止連  
閏實歷俸三十六箇月三年任滿任內先

因京庫錢糧未完繼因地方失盜獲不及  
數二次奉文住俸京庫錢糧隨已徵完題  
允開復未獲盜賊亦已捕獲過半遇蒙

恩詔詳允開復例應給由又據直隸徐州蕭縣  
申准本縣知縣魏研閔稱見年三十五歲  
陝西漢中府石泉縣人由選貢萬曆二十  
一年十二月內除授山西平陽府絳州絳  
縣縣丞二十六年十二月內陞授今職二  
十七年三月初五日到任內因地方失盜

獲不及半奉文罰俸一箇月不作實歷外  
扣至三十年閏二月初四日止連閏實歷  
俸三十六箇月三年任滿任內又因京庫  
錢糧未完奉文住俸隨已解完題

准開復例應給由各等因申報到臣俱經批行  
潁淮二兵備道查勘去後續據潁州兵備  
副使劉如寵呈稱行據鳳陽府呈查勘得  
泗州知州曾惟誠三年任內經管徵解過  
起運本折并存留折色各項錢糧完及九

分積蓄稻穀過額拆賣引鹽清解軍士俱  
已足數收支贓罰明白保民實政五事農  
桑等項六事俱各修舉定遠縣知縣蘇日  
登三年任內徵收各項錢糧完及分數積  
蓄稻穀拆賣引鹽俱已過額清解軍士足  
數收支贓罰明白農桑等項六事保民實  
政五事俱已咸修二官任內委因未完戶  
部項下京庫錢糧奉  
旨住俸俱經完解已蒙題

准開復蘇日登又因獲盜不及數奉文住俸後  
已捕獲一半之上遇蒙萬曆二十九年十  
月十五日

恩詔開復又諉本道覆覈別無違礙應准給由  
等因又據淮徐兵備副使劉大文呈稱行  
據徐州申查勘得蕭縣知縣魏研三年任  
內經管各項錢糧除奉例蠲免外實徵銀  
兩已完九分之上積穀清軍俱已足數拆  
賣引鹽已盡收支贓罰明白農桑等項六

事保民實政五事俱已修舉任內委因地  
方失盜獲不及半奉文罰俸一箇月已經  
扣除不作實歷又因未完戶部項下京庫  
錢糧住俸督催旋經解完亦蒙題

准開復又諉本道覆查委無違礙應准給由等  
因各呈詳前來卷查先准吏部咨為酌議  
考課之法以肅吏治事今後府州縣正官  
給由免其赴京聽撫按從公考覈賢否具  
奏先令就彼復職管事牌冊差人齎繳其稱



職經薦應得

詰勅命者照例

請給又為申飭考滿官員罰俸事例以定法守  
事節開在外考滿官員罰俸月日俱不准  
作實歷掌印管糧官錢糧料價完過八分  
以上照例考覈又准戶部咨為欽奉

聖諭事諒本部題類覆內開泗州知州曾惟誠  
定遠縣知縣蘇日登蕭縣知縣魏研原欠  
見徵帶徵京庫錢糧俱已完解各官所住

俸糧應准開支各等因題奉

欽依移咨前來除欽遵通行查照外今據前因  
諒臣會同巡按直隸監察御史李思孝考  
覈得泗州知州曾惟誠明敏才諳謹嚴操  
履定遠縣知縣蘇日登清約守己豈弟宜  
人蕭縣知縣魏研明敏之才和平之政俱  
稱職查得各官任內因拖欠京庫錢糧住  
俸督催解完俱已題

准開復蘇日登又因地方失盜獲不及數類叅

住俸今已捕獲一半之上遇蒙

恩詔開復魏研亦因地方失盜獲不及半類蒙  
罰俸一箇月已經扣足俱屬因公既經各  
道查無違礙臣等覆覈相同俱應准其給  
由除行各官照例復職接俸管事造冊差  
人齎部外伏乞

勅下吏部覆加考覈施行緣係遵例考覈給由  
州縣正官事理未敢擅便為此具本專差  
承差蔡宗齋捧謹題請

旨

萬曆三十年七月初十日具題奉

聖旨吏部知道

釋放高墻罪宗疏

題為酌議高墻宗庶情罪乞

賜釋放以廣

皇仁事行據整飭潁州兵備副使劉如寵呈蒙  
鳳陽撫按衙門劄案准守備鳳陽太監手  
本內開高墻禁住罪庶比照近日

恩詔查審情罪會

題釋放緣由備仰本道督行鳳陽府掌印官  
會同守備太監并留守司正官查將高墻



各該宗犯吊取原發文卷查其所犯事情輕重年月遠近有無牽連被誣情有可矜者參酌情罪應否釋放逐一查勘明白通詳以憑會

題施行等因蒙此隨該本道遵依轉行鳳陽府知府金時舒遵奉會同守備太監吳忠留守司署正留守淡章等查將在牆各罪犯所犯情罪造冊呈送到道逐一覆加參詳除罪犯深重及該禁未久俱不開外今

將罪犯稍輕年力已邁禁錮已久揆情可原共罪宗五起計正犯并各原來及續生男婦共二十八名口列款登答開報到據此案查先准守備鳳陽太監吳忠手本為懇恩疎活救援無辜乞賜轉達俯憐朽命還鄉事萬曆三十年閏二月內據守護中高等牆委官千百戶初登等呈據後西等宅庶人廷堂等各擊門哀泣投告訴詞內稱堂等禍因先年讐惡架詞陷害誣枉

送簇高牆幽禁四十餘年守法拘禁終日  
涕泣苦楚萬狀羅網無伸雖欲伸冤無門  
控訴近蒙

詔書一款凡官員軍民一切犯罪俱量減宥近  
又幸蒙撫按兩院代天行道堂等泣思

皇上洪恩三年一次恤刑憫民間之苦減赦罪  
賊死者復生惟庶宗之愆並未纖毫仰霑  
各犯之罪輕重有之寔與軍民事同一體  
伏望洞察久銜冤苦俯賜垂憐朽命還鄉  
頂恩再造等因具呈到監據此為照告詞  
其中情真罪當委難議擬內有牽連被誣  
兼有老邁龍鍾鰥寡孤獨疋羸憔悴自食  
自黥者情皆可憫今值

覃恩頒

詔之際正當天赦減法之秋又行管事太監等  
官周春等公同前去各牆督令防範看牆  
委官查審各該宗犯具訴情由與軍民犯  
罪事雖各異而情有軒輊之殊軍民既屬

有憫

天潢宗派尤當矜恤等因到監看得各庶哀痛乞欲轉達釋放情有可原伏乞會議具

題庶罪宗早得超囹圄之困苦拔覆盆之冤情而每日供億之需每歲修理住宅之費亦可節省一分則民受一分之賜矣准此隨經劄行潁州兵備道查勘去後今據前因諛臣會同巡按直隸監察御史李思孝守備鳳陽等處管文書內官監太監吳忠

議照高牆庶人所犯情罪各有重輕至如犯諛真正人命強盜重情自難輕議第其間有無知誤犯情似稍輕且禁錮年久懲創已深疔羸憔悴殘喘奄延况又續生子女繁夥俱係無辜在禁抑鬱愁苦誠可矜憐臣等查得嘉隆年間或遇蒙

恩詔或特奉

明旨屢有釋放至我

皇上萬曆十三年採言官王繼先天時亢陽一



疏特奉

明旨行鳳陽撫按官查審將情輕各庶正犯并家屬分別具

奏釋放自後遇有正犯身故遺下家口臣等不時具

題禮部覆奉

欽依釋放送回原府居住今遇

冊立

覃恩赦及於未發恩加於齊民

幽禁高牆罪

庶原係

天潢一派豈有不得霑涓滴之恩者故各庶在禁日夜悲思翹首跂足不啻枯木之望雨露嚴寒之望春溫也今據談道會同司府各官詳審明白前來而臣等覆加查覈無異謹將各庶原行押發硃語畧節情詞分別禁住久近與應釋緣由開具前件逐起登答題

請伏乞

勅下部院再加查勘原犯情節果無隱諱重情  
議擬上

請釋放則

皇上好生之德無不溥被而再造之仁先及於  
宗親矣緣係酌議高牆宗庶情罪乞

賜釋放以廣

皇仁事理未敢擅便為此具本專差承差蔡宗  
齋捧謹題請

旨

計開

一起稽查隱匿人命以昭法紀事萬曆

十九年該刑部察議庶人廷堂到

牆該監查得本庶與竊盜蕭天福

相毆未死後被羣賊將蕭天福打

死禍及本庶况夥賊俱已監故足

以抵償續生男女五名口見年六

十八歲幽禁十二年朽邁龍鍾委

可矜疑據該府知府金時舒查得

廷堂係山西

代府和川王府奉國將軍因竊盜蕭天福強  
梁夥賊陳天祿董文珠趙鎮恨欲  
謀殺已久適值廷堂往楊思仁家  
逼取債銀會羣盜在彼嚷罵內蕭  
天福出言不遜廷堂不忿用鐵尺  
將天福打倒未死陳天祿等乘機  
用刀將天福殺死分屍滅跡事發  
陳天祿等擬辟將廷堂發高牆禁

住切詳蕭天福本非善類其殺之  
者實係夥賊陳天祿造意董文珠  
手刃與趙鎮支解其屍各犯俱已  
服罪足償蕭天福一命矣廷堂雖  
下手一擊未至於死且又不曾相  
與支解幽禁一十二年似足示警  
矧年已龍鍾情殊可原

前件據該道覆看得蕭天福既係竊  
盜本非善良而夥盜陳天祿等惡其

強橫有心謀害已非一日乃因廷堂一擊之頃遂爾乘機殺死實非本庶殺之也今天祿等既已監故則天福一命已有三抵較比真正人命似已過重况本宗年已衰殘情委可憫罪犯稍輕相應議宥諛臣等覆詳無異委應釋放伏候

聖裁

一起橫暴兇逆舉刀割傷堂叔垂命事

萬曆二十一年該都察院等衙門叅族庶人謨堧到牆諛監查得本庶兇性因事持刀意欲自刎誤傷族叔本庶續生男女四名口見年二十八歲幽禁十年原係誤傷似屬頗輕當可矜疑據諛府知府金時舒查得謨堧係陝西

韓府通渭王府未祿宗室因與總麻叔融蹠同飲俱醉融蹠說其逆母之事本



庶不服扒觸致叔採打回家持刀  
上門刎賴而叔復毆有誤傷肋  
皮血出致發高牆切照本庶酒醉  
持刀意欲自刎不意叔奪刀誤傷  
皮膚傷既甚微旋即平復情有可  
原似應矜恤

前件據諛道覆看得謾喫與總麻叔  
融蹠飲酒忿爭語言譏刺遂持刀欲  
行自刎因其奪刀以致誤傷叔肋實

與有意持刀殺叔者情似有間罪犯  
稍輕相應議宥諛<sub>臣</sub>等覆詳無異委  
應釋放伏候

聖裁

一起稔惡逆賊盜發墳塚劫棺暴屍事  
隆慶五年諛都察院等衙門叅發  
庶人安范一中到牆其一中禁故  
遺下家屬題

請釋放外止遺安范隻身諛監查得安范同一

中盜發墳塚一中已經禁故安澣  
妻子俱已禁止本庶鰥居自黥殘  
疾行走不便見年六十一歲幽禁  
三十二年罪重情輕據諛府知府  
金時舒查得安澣係河南

汝陽王府奉國將軍先同已故一中發掘孀  
母劉氏墳墓未見棺槨時被安澣  
遇見免免未詞將墳封填過五日  
後一中復領蕭住子將劉氏墳墓

掘開住子與一中進內一中開棺  
盜出玳珠金銀等物追出在謹安  
澣未見同掘開棺亦無追出玳珠  
等物致發高牆一中禁故安澣妻  
子亦皆禁止本庶年老殘疾鰥居  
幽禁三十二年情殊可矜

前件據諛道覆看潯安澣先雖與禁  
故一中發掘孀母之墳原未見棺後  
一中自掘盜財本庶實未同行又未

追出財物逮發高牆幽禁三十餘年  
妻子物故殆盡年老殘疾鰥居自爨  
情委可矜相應議宥諫臣等覆詳無  
異委應釋放伏候

聖裁

一起兇宗糾衆打死人命事隆慶六年  
諫都察院等衙門叅黜庶人俊纂  
原來二名口到牆諫監查得本庶  
同俊輾充狄充熙家人尚的毆死

張霞已將尚的問絞纂發高牆司  
宗共毆罪及一人本庶見年六十  
二歲幽禁三十一年情有可矜據  
諫府知府金時舒查得俊纂係山  
西

代府潞城王府鎮國中尉同弟侄俊輾充熙  
等挾妓出城飲酒因恠張霞在於  
墳傍地內拔草回言不遜謀同各  
庶并家人尚的將霞毆死尚的問

擬加功絞罪稟以造意致戮高牆  
但人命已有人抵償本庶似屬矜  
疑

前件據談道覆看得俊稟與弟侄俊  
轅等出城遊戲遇張霞在墳拔草嗔  
其回言不遜謀毆張霞身死今家人  
尚的既已加功擬絞足以抵霞之命  
矣本庶禁錮多年悔艾日深似在可  
宥談臣等覆詳無異委應釋放伏候

### 聖裁

一起地方賊情事嘉靖四十三年談刑

部叅送庶人知墩新挂知賊新墜  
表梳知炭知薊到牆其知墩等六  
名陸續病故遺下家屬俱經題

請釋放訖止遺新墜係已故知墩子并續生男

婦女共十三名口談監查得本庶  
父知墩等六名俱已禁故止遺本  
庶原係牽連見年六十九歲幽禁



三十九年情委可矜據諛府知府  
金時舒查得新墜係山西

慶城王府奉國將軍因同父知墩及新挂知  
贖表梳知炭知蘭夥盜百人劫殺  
多命致發高墻禁錮多年情猶可  
恤

前件據諛道覆看得新墜係知墩之  
子因父與新挂等為盜發禁高墻但  
知墩等俱已禁故止遺本庶原情一

家盡科宦無以父而累其子者乎今  
幽禁三十九載行已又六十九年情  
在可原諛<sub>臣</sub>等覆詳無異委應釋放  
伏候

聖裁

萬曆三十年七月初十日具題奉

聖旨諛部院知道







